

四庫全書

子部

欽定四庫全書

子部

備急千金要方卷八十一至

三

詳校官太醫院醫官臣姜晟

編修臣倉聖脈覆勘

總校官中書臣朱鈐

校對官中書臣胡紹基

謄錄監生臣李維瀛

欽定四庫全書

備急千金要方卷八十一

唐 孫思邈 撰

宋 林億等 校正

養性

養性序第一

扁鵲云黃帝說晝夜漏下水百刻凡一刻人百三十五
息十刻一千三百五十息百刻一萬三千五百息人之
居世數息之間信哉嗚呼昔人嘆逝何可不爲善以自

補邪吾常思一日一夜有十二時十日十夜百二十時
百日百夜一千二百時千日千夜一萬二千時萬日萬
夜一十二萬時此爲三十年若長壽者九十年只得三
十六萬時百年之內斯須之間數時之活朝菌蟪蛄不
足爲喻焉可不自攝養而馳騁六情孜孜汲汲追名逐
利干詐萬巧以求虛譽沒齒而無厭故養性者知其如
此於名於利若存若亡於非名非利亦若存若亡所以
沒身不殆也余慨時俗之多僻皆放逸以殞亡聊因暇

日粗述養性篇用獎人倫之道好事君子與我同志焉
夫養性者欲所習以成性性自爲善不習無不利也性
既自善內外百病自然不生禍亂災害亦無由作此養
性之大經也善養性者則治未病之病是其義也故養
性者不但餌藥餐霞其在兼於百行百行周備雖絕藥
餌足以遐年德行不充縱服玉液金丹未能延壽故老
子曰善攝生者陸行不遇虎兇此則道德之指也豈假
服餌而祈遐年哉聖人所以制藥餌者以救過行之人

也故危者抱病歷年而不修一行纏痼沒齒終無悔心
此其所以岐和長逝彭跗永歸良有以也嵇康曰養生
有五難名利不去為一難喜怒不除為二難聲色不去
為三難滋味不絕為四難神慮精散為五難五者必存
雖心希難老口誦至言咀嚼英華呼吸太陽不能不迴
其操不夭其年也五者無於胸中則信順日躋道德日
全不祈善而有福不求壽而自延此養生之大旨也然
或有服膺仁義無甚泰之累者抑亦其亞歟

黃帝問於岐伯曰余聞上古之人春秋皆度百歲而動作不衰今時之人年至半百而動作皆衰者時代異邪將人失之也岐伯曰上古之人其知道者法則陰陽和於術數飲食有常節起居有常度不妄作勞故能形與神俱而盡終其天年度百歲乃去今時之人則不然以酒為漿以妄為常醉以入房以欲竭其精以耗散其真不知持滿不時御神務快其心逆於生樂起居無節故半百而衰也夫上古聖人之教也下皆為之虛邪賊風

避之有時恬澹虛無真氣從之精神守內病安從來是
以其志閑而少欲其心安而不懼其形勞而不倦氣從
以順各從其欲皆得所願故甘其食美其服素問作美其食任其
服樂其俗高下不相慕故其民日朴是以嗜欲不能勞
其目淫邪不能惑其心愚智賢不肖不懼於物合於道
數故皆能度百歲而動作不衰者其德全不危也是以
人之壽夭在於搏節若消息得所則長生不死恣其情
慾則命同朝露也岐伯曰人年四十而陰氣自半也起

居衰矣年五十體重耳目不聰明也年六十陰痿氣力
大衰九竅不利下虛上實涕泣俱出故曰知之則強不
知則老同出名異智者察同愚者察異愚者不足智者
有餘有餘則耳目聰明身體輕強年老復壯壯者益理
是以聖人為無為之事樂恬澹之味能縱欲快志得虛
無之守故壽命無窮與天地終此聖人之治身也

春三月此謂發陳天地俱生萬物以榮夜臥早起廣步
於庭被髮緩形以使志生生而勿殺與而勿奪賞而勿

罰此春氣之應養生之道也逆之則傷肝夏為寒為變則奉長者少

夏三月此謂蕃秀天地氣交萬物華實夜臥早起毋厭於日使志無怒使華英成秀使氣得泄若所愛在外此夏氣之應養長之道也逆之則傷心秋為瘡瘡則奉收者少冬至重病

秋三月此謂容平天氣以急地氣以明早臥早起與雞俱興使志安寧以緩秋刑收斂神氣使秋氣平毋外其

志使肺氣清此秋氣之應養收之道也逆之則傷肺冬
為養泄則奉藏者少

冬三月此謂閉藏水冰地坼無擾乎陽早臥晚起必待
日光使志若伏若匿若有私意若已有得去寒就溫毋
泄皮膚使氣亟奪此冬氣之應養藏之道也逆之則傷
腎春為痿厥則奉生者少

天有四時五行以生長收藏以寒暑燥濕風人有五臟
化為五氣以生喜怒悲憂恐故喜怒傷氣寒暑傷形暴

怒傷陰暴喜傷陽故喜怒不節寒暑失度生乃不固人能依時攝養故得免其夭枉也

仲長統曰王侯之宮美女兼千卿士之家侍妾數百晝則以醇酒淋其骨髓夜則房室輸其血氣耳聽淫聲目樂邪色醺內不出遊外不返王公得之於上豪傑馳之於下及至生產不時字育太早或童孺而擅氣或疾病而構精精氣薄惡血脉不充既出胞藏養護無法又蒸之以綿繡爍之以五味胎傷孩病而脆未及堅剛復縱

情欲重重相生病病相孕國無良醫醫無審術姦佐其
間過謬常有會有一疾莫能自免當今少百歲之人者
豈非所習不純正也抱朴子曰或問所謂傷之者豈色
欲之間乎答曰亦何獨斯哉然長生之要其在房中上
士知之可以延年除病其次不以自伐若年當少壯而
知還陰丹以補腦采七益於長俗一作谷者不服藥物不
失一二百歲也但不得仙耳不得其術者古人方之於
淩杯以盛湯羽苞之蓄火又且才所不逮而強思之傷

也力所不勝而強舉之傷也深憂重患傷也悲哀憔悴傷也喜怒過度傷也汲汲所欲傷也戚戚所患傷也久談言笑傷也寢息失時傷也挽弓引弩傷也沈醉嘔吐傷也飽食即臥傷也跳走喘乏傷也懽呼哭泣傷也陰陽不交傷也積傷至盡盡則早亡盡則非道也是以養性之士唾不至遠行不疾步耳不極聽目不極視坐不久處立不至疲臥不至懽先寒而衣先熱而解不欲極饑而食食不可過飽不欲極渴而飲飲不欲過多飽食

過多則結積聚渴飲過多則成痰癖不欲甚勞不欲甚
佚不欲流汗不欲多唾不欲奔走車馬不欲極目遠望
不欲多啖生冷不欲飲酒當風不欲數數沐浴不欲廣
志遠願不得規造異巧冬不欲極溫夏不欲窮涼不欲
露臥星月不欲眠中用扇大寒大熱大風大霧皆不欲
胃之五味不欲偏多故酸多則傷脾苦多則傷肺辛多
則傷肝鹹多則傷心甘多則傷腎此五味尅五臟五行
自然之理也凡言傷者亦不即覺也謂久即損壽耳是

以善攝生者臥起有四時之早晚興居有至和之常制
調利筋骨有偃仰之方祛疾閑邪有吐納之術流行榮
衛有補瀉之法節宣勞佚有與奪之要忍怒以全陰抑
喜以養陽然後先服草木以救虧缺後服金丹以定無
窮養性之理盡於此矣夫欲快意任懷自謂達識知命
不泥異端極性肆力不勞持久者聞此言也雖風之過
耳電之經目不足喻也雖身枯於留連之中氣絕於綺
紈之際而甘心焉亦安可告之以養性之事哉匪惟不

納乃謂妖訛也而望彼信之所謂以明鑒給朦瞽以絲竹娛聾夫者也

魏武與皇甫隆令曰聞卿年出百歲而體力不衰耳目聰明顏色和悅此盛事也所服食施行導引可得聞乎若有可傳想可密示封內隆上疏對曰臣聞天地之性惟人為貴人之所貴莫貴於生唐荒無始劫運無窮人生其間忽如電過每一思此罔然心熱生不再來逝不可追何不抑情養性以自保惜今四海垂定太平之際

又當須展才布德當由萬年萬年無窮當由修道道甚
易知但莫能行臣嘗聞道人蒯京已年一百七十八而
甚丁壯言人當朝朝服食玉泉琢齒使人丁壯有顏色
去三蟲而堅齒玉泉者口中唾也朝旦未起早漱津令
滿口乃吞之琢齒二七遍如此者乃名曰練精

嵇康云穰歲多病饑年少疾信哉不虛是以關中土地
俗好儉嗇厨膳餽羞不過菹醬而已其人少病而壽江
南嶺表其處饒足海陸鮭膾無所不備土俗多疾而人

早夭北方仕子游宦至彼遇其豐贍以為福祐所臻是以尊卑長幼恣口食噉夜長醉飽四體熱悶赤露眠臥宿食不消未逾期月大小皆病或患霍亂脚氣脹滿或寒熱瘧痢惡核疔腫或癰疽痔漏或偏風猥退不知醫療以至於死凡如此者比肩皆是惟云不習水土都不知病之所由靜言思之可為太息者也學者先須識此以自誠慎

抱朴子曰一人之身一國之象也胃腹之位猶宮室也

四肢之列猶郊境也骨節之分猶百官也神猶君也血
猶臣也氣猶民也知治身則能治國也夫愛其民所以
安其國惜其氣所以全其身民散則國亡氣竭則身死
死者不可生也亡者不可存也是以至人消未起之患
治未病之疾醫之於無事之前不追於既逝之後夫人
難養而易危也氣難清而易濁也故能審威德所以保
社稷割嗜欲所以固血氣然後真一存焉三一守焉百
病却焉年壽延焉

道林養性第二

真人曰雖常服餌而不知養性之術亦難以長生也養性之道常欲小勞但莫大疲及強所不能堪耳且流水不腐戶樞不蠹以其運動故也養性之道莫久行久立久坐久臥久視久聽蓋以久視傷血久臥傷氣久立傷骨久坐傷肉久行傷筋也仍莫強食莫強酒莫強舉重莫憂思莫大怒莫悲愁莫大懼莫跳踉莫多言莫大笑勿汲汲於所欲勿悄悄懷忿恨皆損壽命若能不犯者

則得長生也故善攝生者常少思少念少慾少事少語
少笑少愁少樂少喜少怒少好少惡行此十二少者養
性之都契也多思則神殆多念則志散多慾則志昏多
事則形勞多語則氣乏多笑則臟傷多愁則心懾多樂
則意溢多喜則忘錯昏亂多怒則百脉不定多好則專
迷不理多惡則憔悴無懽此十二多不除則榮衛失度
血氣妄行喪生之本也惟無多無少者幾於道矣是知
勿外緣者真人初學道之法也若能如此者可居瘟疫

之中無憂疑矣既屏外緣會須守五神

肝心脾肺腎

從四正

言行坐立

言最不得浮思妄念心想欲事惡邪大起故孔子

曰思無邪也常當習黃帝內視法存想思念令見五臟如懸磬五色了了分明勿輟也仍於每旦初起面向午展兩手於膝上心眼觀氣上入頂下達涌泉旦旦如此名曰迎氣常以鼻引氣口吐氣小微吐之不得開口復欲得出氣少入氣多每欲食送氣入腹每欲食氣為主人也凡心有所愛不用深愛心有所憎不用深憎並皆

損性傷神亦不用深讚亦不用深毀常須運心於物平等如覺偏頗尋改正之居貧勿謂常貧居富莫謂常富居貧富之中常須守道勿以貧富易志改性識達道理似不能言有大功德勿自矜伐美藥勿離手善言勿離口亂想勿經心常以深心至誠恭敬於物慎勿詐善以悅於人終身為善為人所嫌勿得起恨事君盡禮人以為諂當以道自平其心道之所在其德不孤勿言行善不得善報以自怨仇居處勿令心有不足若有不足則

自抑之勿令得起人知止足天遺其祿所至之處勿得多求多求則心自疲而志苦若夫人之所以多病當由不能養性平康之日謂言常然縱情恣慾心所欲得則便為之不拘禁忌欺罔幽明無所不作自言適性不知過後一一皆為病本及兩手摸空白汗流出口唱皇天無所逮及皆以生平粗心不能自察一至於此但能少時內省身心則自知見行之中皆畏諸病將知四百四病身手自造本非由天及一朝病發和緩不救方更誹

謗醫藥無效神仙無靈故有智之人愛惜性命者當自
思念深生恥愧誠勒身心常修善事也至於居處不得
綺靡華麗令人貪婪無厭乃患害之源但令雅素淨潔
無風雨暑濕為佳衣服器械勿用珍玉金寶增長過失
使人煩惱根深厨膳勿使脯肉豐盈常令儉約為佳然
後行作鵝王步語作含鍾聲眠作獅子臥右脚脇著地坐脚也每
日自詠歌云美食須熟嚼生食不粗吞問我居止處大
宅總林村胎息守五臟氣至骨成仙又歌曰日食三箇

毒不嚼而自消錦繡為五臟身著糞掃袍修心既平又

須慎言語凡言語讀誦常想聲在氣海中

也臍下

每日初

入後勿言語讀誦寧待平旦也旦起欲專言善事不欲

先計校錢財又食上不得語語而食者常患胃背痛亦

不用寢臥多言笑寢不得語言者言五臟如鐘磬不懸

則不可發聲行不得語若欲語須住脚乃語行語則令

人失氣冬至日止可語不可言自言曰言答人曰語言

有人來問不可不答自不可發言也仍勿觸冷開口大

語為佳言語既慎仍節飲食是以善養性者先饑而食
先渴而飲食欲數而少不欲頓而多則難消也常欲令
如飽中饑饑中飽耳蓋飽則傷肺饑則傷氣鹹則傷筋
酸則傷骨故每學淡食食當熟嚼使米脂入腹勿使酒
脂入腸人之當食須去煩惱暴數為煩
侵觸為惱如食五味必不
得暴噉多令人神驚夜夢飛揚每食不用重肉喜生百
病常須少食肉多食飯及少菹菜并勿食生菜生米小
豆陳臭物勿飲濁酒食麪使塞氣孔勿食生肉傷胃一

切肉惟須煮爛停冷食之食畢當漱口數過令人牙齒
不敗口香熱食訖以冷酢漿漱口者令人口氣常臭作
蜜齒病又諸熱食鹹物後不得飲冷酢漿水喜失聲成
尸咽凡熱食汗出勿當風發痙頭痛令人目澀多睡每
食訖以手摩面及腹令津液通流食畢當行步躊躇計
使中數里來行畢使人以粉摩腹上數百遍則食易消
大益人令人能飲食無百病然後有所修為為快也飽
食即臥乃生百病不消成積聚飽食仰臥成氣痞作頭

風觸寒來者寒未解食熟食成刺風人不得夜食又云
夜勿過醉飽食勿精思為勞苦事有損餘虛損人常須
日在巳時食訖則不須飲酒終身無乾嘔勿食父母本
身所屬肉令人命不長勿食自己本命所屬肉令人魂
魄飛揚勿食一切腦大損人茅屋漏水墮諸脯肉上食
之成瘕約暴肉作脯不肯乾者凡乾字舊本並作干害人祭神肉
無故自動食之害人飲食上蜂行住食之必有毒害人
腹內有宿病勿食陵鯉魚肉害人濕食及酒漿臨上看

視不見人物影者勿食之成卒注若已食腹脹者急以藥下之每十日一食葵葵滑所以通五臟擁氣又是菜之主不用合心食之又飲酒不欲使多多則速吐之為佳勿令至醉即終身百病不除久飲酒者腐爛腸胃漬髓蒸筋傷神損壽醉不可以當風向陽令人發狂又不當風臥不可令人扇涼皆即得病也醉不可露臥及臥黍穰中發癩瘡醉不可強食或發癰疽或發瘡或生瘡醉飽不可以走車馬及跳躑醉不可以接房醉飽交

接小者面黥咳嗽大者傷絕臟脉損命凡人饑欲坐小便若飽則立小便慎之無病又忍尿不便膝冷成痺忍大便不出成氣痔小便勿努令兩足及膝冷大便不用呼氣及强努令人腰疼目澀宜任之佳凡遇山水隄中出泉者不可久居常食作癭病又深陰地冷水不可飲必作瘕瘕飲食以調時慎脫著凡人旦起著衣反者便著之吉衣光者當戶三振之曰殃去吉濕衣及汗衣皆不可久著令人發瘡及風癢大汗能易衣佳不易者急

洗之不爾令人小便不利凡大汗勿偏脫衣喜得偏風
半身不遂春天不可薄衣令人傷寒霍亂食不消頭痛
脫著既時須調寢處凡人臥春夏向東秋冬向西頭勿
北臥及牆北亦勿安牀凡欲眠勿歌詠不祥起上牀坐
先脫左足臥勿當脊下臥訖勿留燈熅令魂魄及六
神不安多愁怨人頭邊勿安火爐日久引火氣頭重目
赤睛及鼻乾夜臥當耳勿有孔吹人即耳聾夏不用露
面臥令人面皮厚喜成癰或作面風冬夜勿覆頭得長

壽凡人眠勿以脚懸踏高處久成腎水及損房足冷人
每見十步直墻勿順墻臥風利吹人發癩及體重人汗
勿跂牀懸脚久成血痺兩足重腰疼又不得晝眠令人
失氣臥勿大語損人氣力暮臥常習閉口口開即失氣
且邪惡從口入久而成消渴及失血色屈膝側臥益人
氣力勝正偃臥按孔子不尸臥故曰睡不厭踧覺不厭
舒凡人野睡則有鬼痛魔邪凡眠先臥心後臥眼人臥
一夜當作五度反覆常逐更轉凡人夜魔勿然燈喚之

定死無疑閻喚之吉亦不得近前急喚夜夢惡不須說
旦以水面東方喚之呪曰惡夢著草木好夢成寶玉即
無咎矣又夢之善惡並勿說為吉衣食寢處皆適能順
時氣者始盡養生之道故善攝生者無犯日月之忌無
失歲時之和須知一日之忌暮無飽食一月之忌晦無
大醉一歲之忌暮無遠行終身之忌暮無然燭行房暮
嘗護氣也凡氣冬至起於涌泉十一月至膝十二月至
股正月至腰名三陽成二月至臍三月至項四月至頂

純陽用事陰亦倣此故四月十月不得入房避陰陽純用事之月也每冬至日於北壁下厚鋪草而臥云受元氣每八月一日已後即微火煖足勿令下冷無生意常欲使氣在下不欲泄於上春凍未泮衣欲下厚上薄養陽收陰繼世長生養陰收陽禍則滅門故云冬時天地氣閉血氣伏藏人不可作勞出汗發泄陽氣有損於人也又云冬日凍腦春秋腦足俱凍此聖人之常法也春欲晏臥早起夏及秋欲侵夜乃臥早起冬欲早臥而晏

起皆益人雖云早起莫在鷄鳴前雖言晏起莫在日出
後凡冬月忽有大熱之時夏月忽有大涼之時皆勿受
之人有患天行時氣者皆由犯此也即須調氣息使寒
熱平和即免患也每當臘日勿歌舞犯者必凶常於正
月寅日燒白髮吉凡寅日剪指甲午日剪足甲又燒白
髮吉

居處法第三

凡人居止之室必須周密勿令有細隙致有風氣得入

小覺有風勿強忍久坐必須急急避之久居不覺使人
中風古來忽得偏風四肢不隨或如角弓反張或失音
不語者皆由忽此耳身既中風諸病總集邪氣得便遭
此致卒者十中有九是以大須周密無得輕之慎焉慎
焉所居之室勿塞井及水漬令人聾盲

凡在家及外行卒逢大飄風暴雨震電昏暗大霧此皆
是諸龍鬼神行動經過所致宜入室閉戶燒香靜坐安
心以避之待過後乃出不爾損人或當時雖未苦於後

不佳矣又陰霧中亦不可遠行

凡家中有經像行來先拜之然後拜尊長每行至則峻坐焉

凡居家不欲數沐浴若沐浴必須密室不得大熱亦不得大冷皆生百病冬浴不必汗出霰霰沐浴後不得觸風冷新沐髮訖勿當風勿濕縈髻勿濕頭臥使人頭風眩悶髮禿面黑齒痛耳聾頭生白屑饑忌浴飽忌沐浴訖須進少許食飲乃出夜沐髮不食即臥令人心虛饒

汗多夢又夫妻不用同日沐浴常以晦日浴朔日沐吉
凡炊湯經宿用洗體成癬洗面無光洗脚即疼痛作甌
畦瘡熱泔洗頭冷水濯之作頭風飲水沐頭亦作頭風
時行病新汗解勿冷水洗浴損心包不能復

凡居家常戒約內外長幼有不快即須早道勿使隱忍
以為無若過時不知便為重病遂成不救小有不好即
按摩按捺令百節通利泄其邪氣凡人無間有事無事
常須日別躡脊背四肢一度頭項若令熟躡即風氣時

行不能侵人此大要妙不可具論

凡人居家及遠行隨身常有熟艾一升備急丸辟鬼丸生肌藥甘濕藥丁腫藥水銀大黃芒硝甘草乾薑桂心蜀椒不能更蓄餘藥此等常不可闕少及一兩卷百一備急藥方並帶辟毒蛇蜂蝎等藥隨身也

凡人自覺十日已上康健即須灸三數穴以洩風氣每日必須調氣補瀉按摩導引為佳勿以康健便為常然常須安不忘危預防諸病也灸法當須避人神

人神禁忌法在

第二十
九卷中
凡畜手力細累春秋皆須與轉瀉藥一度則不
中天行時氣也

備急千金要方卷八十一

欽定四庫全書

備急千金要方卷八十二 唐 孫思邈 撰

宋 林億等 校正

養性

按摩法第四

天竺國按摩此是婆羅門法

兩手相捉紐捩如洗手法 兩手淺相叉翻覆向背

兩手相捉共按脍左右同 以手如挽五石力弓左右

同

兩手相重按胘徐徐換身左右同

作拳向前築左右同

作拳却頓此是開胃左右

同

如拓石法左右同

以手反槌背上左右同

兩手據地縮身曲脊向上三舉

兩手抱頭宛轉胘上此是抽脅

大坐斜身偏歌如排山左右同

大坐伸兩腳即以一腳向前虛掣左右同

兩手拒地迴顧此是虎視法左右同

立地反拗身三舉

兩手急相叉以腳踏手中左右同

起立以腳前後虛踏左右同

大坐伸兩腳用當相手勾所伸腳著膝中以手按之左

右同

右十八勢但是老人日別能依此三遍者一月後百

病除行及奔馬補益延年能食眼明輕健不復疲乏

老子按摩法

兩手捺脛左右捩身二七遍

兩手捻脛左右紐肩二七遍

兩手抱頭左右紐腰二七遍

左右挑頭二七遍
兩手托頭三舉之

一手抱頭一手托膝三折左右同

一手托頭一手托膝從下向上三遍左右同

兩手攀頭下向三頓足

兩手相捉頭上過左右三

遍

兩手相叉托心前推却挽三遍

兩手相叉著心三遍

曲腕築肋挽肘左右亦三

遍

左右挽前後拔各三遍

舒手挽項左右三遍

反手著膝手挽肘覆手著膝上左右亦三遍

手摸肩從上至下使遍左右同

兩手空拳築三遍

兩手相叉反覆攪各七遍

外振手三遍內振三遍覆手振亦三遍

摩紐指三遍

兩手反搓三遍

兩手反叉上下紐肘無數單用十呼

兩手上聳三遍

兩手下頓三遍

兩手相叉頭上過左右申肋十遍

兩手拳反背上掘脊上下亦三遍

掘措之也

兩手反捉上下直脊三遍

覆掌搦腕內外振三遍

覆掌前聳三遍

覆掌兩手相叉交橫三遍

覆掌橫直即聳三遍

若有手患冷從上打至下得熱便休

舒左脚右手承之左手捺腳聳上至下直腳三遍右手

捺腳亦爾

前後捺足三遍

左捺足右捺足各三遍

前後却捺足三遍

直腳三遍

紐脰三遍

內外振腳三遍

若有腳患冷者打熱便休

紐脰以意多少頓脚三遍

却直脚三遍

虎據左右紐肩三遍

推天托地左右三遍

左右排山負山拔木各三遍

舒手直前頓申手三遍

舒兩手兩膝亦各三遍

舒脚直反頓申手三遍

捩內脊外脊各三遍

調氣法第五

彭祖曰道不在煩但能不思衣食不思聲色不思勝負
不思曲直不思得失不思榮辱心無煩形勿極而兼之

以導引行氣不已亦可得長年千歲不死凡人不可無
思當以漸遣除之彭祖曰和神導炁養道當得密室閉
戶安牀煖席枕高二寸半正身偃臥瞑目閉氣於胸膈
中以鴻毛著鼻上而不動經三百息耳無所聞目無所
見心無所思如此則寒暑不能侵蜂蠆不能毒壽三百

六十歲此隣於真人也每旦夕

旦夕者足陰陽轉換之時凡旦五更初煖氣至

頻頻眼閉是上生氣至名曰陽息而陰消暮日入後冷氣至凜凜然時乃至牀坐睡倒是下生氣至名曰陽消而陰息旦五更初煖氣至暮日入後冷氣至常出入天地日月山川河海人畜草木一切萬物體中代謝往來

無時休息進退如晝夜之更迭如海面午展兩手於脚
海水之潮汐是天地消息之道也

膝上徐徐按捺肢節口吐濁氣鼻引清氣

凡吐者去故氣亦名死氣

納者取新氣亦名生氣故老子經云玄牝之門天地之根綿綿若存時之不勤言口鼻天地之間可以出納陰陽死生之氣也良久徐徐乃以手左托右托上托下托前托後

托瞋目張口叩齒摩眼押頭拔耳挽髮放腰咳嗽發揚振動也雙作隻作反手為之然後掣足仰振數八十九十而止仰下徐徐定心作禪觀之法閉目存思想見空中太和元氣如紫雲成蓋五色分明下入毛際漸漸入

頂如雨初晴雲入山透皮入肉至骨至腦漸漸下入腹
中四肢五臟皆受其潤如水滲入地若徹則覺腹中有
聲汨汨然意專思存不得外緣斯須即覺元氣達於氣
海須臾則自達於涌泉則覺身體振動兩脚蹠曲亦令
牀坐有聲拉拉然則名一通一通二通乃至日別得三
通五通則身體悅懌面色光輝鬢毛潤澤耳目精明令
人食美氣力強健百病皆去五年十歲長存不忘得滿
千萬通則去仙不遠矣人身虛無但有遊氣氣息得理

即百病不生若消息失宜即諸病競起善攝養者須知調氣方焉調氣方療萬病大患百日生眉鬚自餘者不足言也

凡調氣之法夜半後日中前氣生得調日中後夜半前氣死不得調調氣之時則仰臥牀鋪厚軟枕高下共身平舒手展脚兩手握大拇指節去身四五寸兩脚相去四五寸數數叩齒飲玉漿引氣從鼻入腹足則停上有力更取久住氣悶從口細細吐出盡遠從鼻細細引入

出氣一准前法閉口以心中數數令耳不聞恐有誤亂
兼以手下籌能至千則去仙不遠矣若天陰霧惡風猛
寒勿取氣也但閉之

若患寒熱及卒患癰疽不問日中疾患未發前一食間
即調如其不得好瘥明日依式更調之

若患心冷病氣即呼出若熱病氣即吹出若肺病即噓
出若肝病即呵出若脾病即唏出若腎病即呬出夜半
後八十一鷄鳴七十二平旦六十二日出五十四辰時

四十五已時三十六欲作此法先左右導引三百六十遍病有四種一冷痺二氣疾三邪風四熱毒若有患者安心調氣此法無有不瘥也

凡百病不離五臟五臟各有八十一種疾冷熱風氣計成四百四病事須識其相類善以知之

心臟病者體冷熱相法心色赤患者夢中見人著赤衣持赤刀杖火來怖人療法用呼吹二氣呼療冷吹治熱肺臟病者胃背滿脹四肢煩悶相法肺色白患者喜夢

見美女美男詐親附人共相抱持或作父母兄弟妻子
療法用噓氣出

肝臟病者憂愁不樂悲思喜頭眼疼痛相法肝色青夢
見人著青衣捉青刀杖或獅子虎狼來恐怖人療法用
呵氣出

脾臟病者體上遊風習習徧身痛煩悶相法脾色黃通
土色夢或作小兒擊歷人邪猶人或如旋風團圞轉治
法用唏氣出

腎臟病者體冷陰衰面目惡痿相法腎色黑夢見黑衣
及獸物捉刀杖相怖用呬氣出

冷病者用大呼三十遍細呼十遍呼法鼻中引氣入口
中吐氣出當令聲相逐呼字而吐之熱病者用大吹五
十遍細吹十遍吹如吹物之吹當使字氣聲似字肺病
者用大噓三十遍細噓十遍肝病者用大呵三十遍細
呵十遍脾病者用大唏三十遍細唏十遍腎病者用大
呬五十遍細呬三十遍此十二種調氣法若有病依此

法恭敬用心無有不瘥皆須左右導引三百六十遍然
後乃為之

服食法第六

論方

論曰凡人春服小續命湯五劑及諸補散各一劑夏大
熱則服腎瀝湯三劑秋服黃耆等丸一兩劑冬服藥酒
兩三劑立春日則止此法終身常爾則百病不生矣俗
人見淺但知鉤吻之殺人不信黃精之益壽但識五穀
之療饑不知百藥之濟命但解施瀉以生育不能閉固

以頤養故有服餌方焉。却惜曰：夫欲服食當尋性理所宜，審冷煖之適，不可見彼得力，我便服之。初御藥皆先草木次石，是為將藥之大較也。所謂精粗相代，階粗以至精者也。夫人從少至長，體習五穀，卒不可一朝頓遺之。凡服藥物為益遲微，則無充饑之驗。然積年不已，方能骨髓填實，五穀居然，而自斷今人多望朝夕之效，求目下之應。腑臟未充，便以絕粒穀氣始除，藥未有用，又將御女形神與俗無別，以此致弊。胡不怪哉！服餌大體

皆有次第不知其術者非止交有所損卒亦不得其力故服餌大法必先去三蟲三蟲既去次服草藥好得藥力次服木藥好得力訖次服石藥依此次第乃得遂其藥性庶事安穩可以延齡矣

去三蟲圓方

生地黃汁三斗東向竈葦火煎三沸內清漆二升以荆七攪之日移一尺內真丹三兩復移一尺內瓜子末三升復移一尺內大黃末三兩微火勿令焦候可

丸丸如梧子大先食服一九日三濁血下鼻中三十日諸蟲皆下五十日百病愈面色有光澤

又方

漆

二升

大黃

六兩末

酒

一升半

蕪菁子

三升末

右四味以微火合煎令可丸如梧子大先食服三丸十日濁血下出鼻中三十日蟲皆爛下五十日身光澤一年行及奔馬消息四體安穩乃可服草藥其餘

法在三蟲篇中備述

三蟲篇見前第十八卷

服天門冬方

天門冬曝乾擣下篩食後服方寸匕日三可至十服
小兒服尤良與松以若蜜丸服之益善惟多彌佳

又方擣取汁微火煎取五斗下白蜜一斗胡麻炒末二
升合煎攪勿息手可丸即止火下大豆黃末和為餅
徑三寸厚半寸一服一枚日三百日已上得益此方
最上妙包衆方一法釀酒服始傷多無苦多即吐去

病也

方見第十
四卷中

蒯道人年近二百而少常告皇甫隆

云但取天門冬去心皮切乾之酒服方寸匕日三令

人不老補中益氣愈百病也天門冬生奉高山谷在

東嶽名淫羊食在中嶽名天門冬在西嶽名管松在

南嶽名百部在北嶽名無不愈在原陸山阜名顛棘

雖然處處有之異名其實一也在北陰地者佳取細

切烈日乾之久服令人長生氣力百倍治虛勞絕傷

年老衰損羸瘦偏枯不隨風濕不仁冷痺心腹積聚

惡瘡癰疽腫癩疾重者周身膿壞鼻柱敗爛服之皮
脫蟲出顏色肥白此無所不治亦治陰痿耳聾目暗
久服白髮黑齒落生延年益命入水不濡服二百日
後恬泰疾損拘急者緩羸劣者強三百日身輕三年
走及奔馬又三年心腹痼疾皆去

服地黃方

生地黃五十斤熟搗絞取汁澄去滓微火上煎減過
半內白蜜五升棗脂一升攪令相得可丸乃止每服

如雞子一枚日三令人肥白

又方地黄十斤細切以醇酒二斗漬三宿出曝乾反復
內漬取酒盡止與甘草巴戟天厚朴乾漆覆盆子各
一斤擣下篩食後酒服方寸匕日三加至二匕使人
老者還少強力無病延年

作熟乾地黄法

採地黄去其鬚葉及細根擣絞取汁以漬肥者著甌
中土若米無在已蓋上蒸之一時出曝燥更內汁中

又蒸汁盡止便乾之亦可直切蒸之半日數以酒灑之使周匝至夕出曝乾可搗蜜丸服之

種地黃法

先擇好地黃赤色虛軟者深耕之臘月逆耕凍地彌好擇肥大好地黃根切長四五分至一二寸許一斛可種一畝二三月種之作畦畔相去一尺生後隨鋤壅數耘之至九月十月視其葉小衰乃掘取一畝得二十許斛擇取大根水淨洗其細根乃剪頭尾輩亦

洗取之日曝令極燥小腸乃以竹刀切長寸餘許白茅露甑下蒸之密蓋上亦可囊盛土填之從旦至暮當黑不盡黑者明日又擇取蒸之先時已擣其細碎者取汁銅器煎之如薄飴遂以地黄內汁中周帀出曝乾又內汁盡止率百斤生者令得一二十斤取初八月九月中掘者其根勿令大老強蒸則不消盡有筋脉初以地黄內甑中時先用銅器承其下以好酒淋地黄上令帀汁後下入器中取以併和煎汁佳

黃精膏方

黃精一石去鬚毛洗令淨潔打碎蒸令好熟壓得汁
復煎去上遊水得一斗內乾薑末三兩桂心末一兩
微火煎看色鬱鬱然欲黃便去火待冷盛不津器中
酒五合和服二合當未食前日二服舊皮脫顏色變
光花色有異鬚髮更改欲長服者不須和酒內生大
豆黃絕穀食之不饑渴長生不老

服烏麻法

取黑皮真檀色者烏麻隨多少水拌令潤勿過濕蒸令氣徧即出曝乾如此九蒸九擣去上皮未食前和水若酒服二方寸七日三漸漸不饑絕穀久服百病不生常服延年不老

餌栢實方

栢子仁二升擣令細醇酒四升漬攪如泥下白蜜二升棗膏三升擣令可丸入乾地黄末白朮末各一升攪和丸如梧子每服三十九日二服二十日萬病皆

愈

餌松子方

七月七日採松子過時即落不可得治服方寸七日
三四一云一服三合百日身輕二百日行五百里絕
穀服昇仙渴飲水亦可和脂服之若丸如梧桐子大
服十丸

服松脂方

百鍊松脂下篩以蜜和內甬中勿令中風日服如博

棊子一枚

博棊長二寸方一寸

日三漸漸月別服一斤不饑延

年亦可淳酒和白蜜如飴日服一二兩至半斤凡取

松脂老松皮自有聚脂者最第一其根下有傷折處

不見日月者得之名曰陰脂彌良惟衡山東行五百

里有大松皆三四十圍乃多脂又法五月刻大松陽

面使向下二十四株株可得半升亦煮其老節根處

有脂得用仙經云常以三月入衡山之陰取不見日

月松脂鍊而餌之即不召而自來服之百日耐寒暑

二百日五臟補益服之五年即見西王母仙經又云
諸石所生三百六十五山其可食者滿谷陰懷中松
脂耳其谷正從衡山嶺直東四百八十里當橫捷正
在橫嶺東北行過其南入谷五十里窮穴有石城白
鶴其東方有大石四十餘丈狀如白松松下二丈有
小穴東入山有丹砂可食其南方陰中有大松大三
十餘圍有三十餘株不見日月皆可取服之

採松脂法

以日入時破其陰以取其膏破其陽以取其脂脂膏等分食之可以通神靈鑿其陰陽為孔令方五寸深五寸還以皮掩其孔無令風入風入則不可服以春夏時取之取訖封塞勿泄以泥塗之東北行丹砂穴有陰泉水可飲此弘農車君以元封元年入此山食松脂十六年復下居長安東市在上谷牛頭谷時往來至秦嶺上年常如三十者

鍊松脂法

松脂七斤以桑灰汁一石煮脂三沸接置冷水中凝復煮之凡十遍脂白矣可服今谷在衡州東南攸縣界此松脂與天下松脂不同

餌茯苓方

茯苓十斤去皮酒漬密封下十五日出之取服如博碁日三亦可屑服方寸匕凡餌茯苓皆湯煮四五沸或以水漬六七日

茯苓酥方

茯苓

五斤灰汁煮十遍漿水
煮十遍清水煮十遍

松脂

五斤煮如茯苓法
每次煮四十遍

生天門冬

五斤去心皮
曝乾作末

白蜜

三斤煎
令沫盡蠟

牛酥

各三斤練
三十遍

右六味各搗篩以銅器重湯上先內酥次蠟次蜜消
訖內藥急攪勿住手務令大均內甕器中密封勿令
泄氣先一日不食欲不食先須喫好美食令極飽然
後絕食即服二兩二十日後服四兩又二十日後八
兩細丸之以咽中下為度第二度以四兩為初二十

日後八兩又二十日二兩第三度服以八兩為初二十日二兩二十日四兩合一百八十日藥成自後服三丸將補不服亦得恒以酥蜜消息之美酒服一升為佳合藥須取四時王相日特忌刑殺厭及四激休廢等日大玄此彭祖法

茯苓膏方

千金翼名凝靈膏

茯苓

淨去皮

松脂

二十四斤

松子仁

栢子仁

各十斤

右四味皆依法鍊之松栢仁不鍊擣篩白蜜二斗四

升內銅器中湯上微火煎一日一夕次第下藥攪令

相得微火煎七日七夜上丸如小棗每服七丸日三

欲絕穀頓服取飽即得輕身明目不老

此方後一本有茯苓酥杏

仁酥地黃酥三方然諸本並無又千金翼中已有今更不添錄

服枸杞根方

主養性
遐齡

枸杞根切一石水一石二斗煮取六斗澄清煎取三

升以小麥一斗乾淨擇內汁中漬一宿曝二徃反令

汁盡曝乾擣末酒服方寸匕日二一年之中以二月

八月各合一劑終身不老

枸杞酒方

枸杞根一百二十斤切以東流水四石煮一日一夜
取清汁一石清麴一如家醞法熟取清貯不津器中
內乾地黄末二斤半桂心乾薑澤瀉蜀椒末各一升
商陸末二升以絹袋貯內酒底緊塞口埋入地三尺
堅覆上三七日沐浴整衣冠再拜平曉向甲寅地日
出處開之其酒赤如金色旦空腹服半升十日萬病

皆愈三十日癥瘕滅惡疾人以水一升和酒半升分

五服愈

千金翼又云若欲服石者取河中青白石如棗杏大者二升以水三升煮一沸以此酒半

合置中須臾即熟可食

餌雲母水方

療萬病

上白雲母二十斤薄擘以露水八斗作湯分半洮洗

雲母如此再過又取二斗作湯內芒硝十斤以雲母

木器中漬之二十日出絹袋盛懸屋上勿使見風日

令燥以水漬鹿皮為囊揉挺之從旦至日中乃以細

絹下篩滓復揉挺令得好粉五斗餘者棄之取粉一斗內崖蜜二斤攪令如粥內生竹筍中薄削之漆固口埋北垣南崖下入地六尺覆土春夏四十日秋冬三十日出之當如澤為成若洞洞不消者更埋三十日出之先取水一合內藥一合攪和盡服之日三水寒溫盡自在服十日小便當變黃此先療勞氣風疹也二十日腹中寒癖消三十日齟齬除更新生四十日不畏風寒五十日諸病皆愈顏色日少長生神仙

吾自驗之所以述錄

鍊鍾乳粉法

鍾乳一斤不問厚薄但取白淨光色好者即任用非此者不堪用先泥鐵鐺可受四五斗者為竈貯水令滿去口三寸內乳著金銀甕甕中任有用之乃下鐺中令水沒甕上一寸餘即得當令如此勿使出水也微火燒日夜不絕水欲竭即添成煖水每一周時輒易水洗鐺并洩乳七日七夜出之淨洩乾內甕鉢中

玉椎縛格少著水研之一日一夜急著水攪令大濁
澄取濁汁其乳粗者自然著底作末者即自作濁水
出即經宿澄取其粗著底者准前法研之凡五日五
夜皆細逐水作粉好用澄鍊取曝乾即更於銀鉢中
研之一日候入肉水洗不落者佳

鍾乳散治虛羸不足六十已上人瘦弱不能食者百病
方

上黨人參 石斛

乾薑

各三分

鍾乳粉

成鍊者
三兩

右四味擣下篩三味與乳合和相得均分作九貼平
旦空腹溫淳酒服一貼日午後服一貼黃昏後服一
貼三日後准此服之凡服此藥法皆三日一劑三日
內止用一升半飯一升肉肉及飯惟爛不得服蔥豉
問曰何故三日少食勿得飽也答曰三夜乳在腹中
熏補臟腑若此飽食即推藥出腹所以不得飽食也
何故不得生食由食生故即損傷藥力藥力既損脂

肪亦傷所以不得食生食也何故不得食蔥豉蔥豉
殺藥故不得食也三日服藥既盡三日內須作羹食
補之任意所便仍不用蔥豉及鞭食也三日補訖還
須准式服藥如前盡此一斤乳訖其氣力當自知耳
不能具述一得此法其後服十斤二十斤任意方便
可知也

西嶽真人靈飛散方

雲母粉

一斤

茯苓

八兩

鍾乳粉

栢子仁

人參

千金翼作白米續斷

桂心

各七兩

菊花

十五兩

乾地黄

十二兩

右九味為末生天門冬十九斤取汁溲藥內銅器中
蒸一石二斗黍米下米熟曝乾為末先食飲服方寸
匕日一三日力倍五日血脉充盛七日身輕十日面
色悅澤十五日行及奔馬三十日夜視有光七十日
白髮盡落故齒皆去更取二十一匕白蜜和擣二百
杵丸如桐子大作八十一枚曝乾丸皆映徹如水精

珠欲令髮齒復生者吞七枚日三服即出髮未白齒
不落者但服盡三百年乃白如前法服已白者餌藥
至七百年乃落入山日吞七丸絕穀不饑余得此方
已來將踰三紀頃面色美而悅之疑而未敢措手積
年詢訪屢有好名人曾餌得力遂服之一如方說但
能業之不已功不徒棄耳

備急千金要方卷八十二

欽定四庫全書

備急千金要方卷八十三 唐 孫思邈 撰

宋 林億等 校正

養性

黃帝雜忌法第七

旦起勿開目洗面令人目澀失明饒淚清旦常言善事
勿惡言聞惡事即向所來方三唾之吉又勿嗔怒勿叱
咤咄呼勿嗟歎勿唱奈何名曰請禍勿立膝坐而交臂

膝上勿令髮覆面皆不祥勿舉足向火勿對竈罵詈凡
行立坐勿背日吉勿面北坐久思不祥起凡欲行來常
存魁網在頭上所向皆吉若欲征戰存斗柄在前以指
敵吉勿面北冠帶凶勿向西北唾犯魁網神凶勿欬唾
唾不用遠成肺病令人手足重及背痛欬嗽亦勿向西
北大小便勿殺龜蛇勿怒目視日月喜令人失明行及
乘馬不用迴顧則神去人不用鬼行踏粟凡過神廟慎
勿輒入入必恭敬不得舉目恣意顧瞻當如對嚴君焉

乃享其福耳不爾速獲其禍亦不得返首顧視神廟勿見龍蛇勿興心驚怪亦勿注意瞻視忽見鬼怪變異之物即強抑之勿怪呪曰見怪不怪其怪自壞又路行及衆中見殊妙美女慎勿熟視而愛之此當魑魅之物使人深愛無問空山曠野稠人廣衆之中皆亦如之凡山水有沙風處勿在中浴害人欲渡者隨驢馬後急渡不傷人有水弩處射人影即死欲渡水者以物打水其弩即散急渡不傷凡諸山有孔穴入採寶者惟三月九月

餘月山閉氣交犯死凡人空腹不用見尸臭氣入鼻舌上白起口常臭欲見尸者皆須飲酒見之能辟毒凶行觸熱塗中逢河勿洗面生烏黥

房中補益第八

論曰人年四十已下多有放恣四十已上即頓覺氣力一時衰退退既至衆病蜂起久而不治遂至不救所以彭祖曰以人療人真得其真故年至四十須諳房中之術夫房中術者其道甚近而人莫能行其法一夕御

十人閉固為謹此房中之術畢矣兼之藥餌四時勿絕則氣力百倍而智慧日新然此方之作也非欲務於淫佚苟求快意務存節欲以廣養生也非苟欲強身力行女色以縱情意在補益以遣疾也此房中之微旨也是以人年四十已下即服房中之藥者皆所以速禍慎之慎之故年未滿四十者不足與論房中之事慾心未止兼餌補藥倍力耗喪不過半年精髓枯竭惟向死近少年極須慎之人年四十已上常固精養炁不耗可以不

老又餌雲母足以愈疾延年人年四十已上勿服瀉藥
常餌補藥大佳昔黃帝御女一千二百而登仙而俗人
以一女伐命知與不知豈不遠矣其知道者御女苦不
多耳凡婦人不必須有顏色妍麗但得少年未經生乳
多肌肉益也若足財力選取細髮目精黑白分明體柔
骨軟肌膚細滑言語聲音和調四肢骨節皆欲足肉而
骨不大其體及腋皆不欲有毫有毫當軟細不可極於
相者但蓬頭蠅面槌項結喉雄聲大口高鼻麥齒目精

渾濁口頤有毫骨節高大髮黃少肉隱毫多而且強又
生逆毫此相不可皆賊命損壽也凡御女之道不欲令
氣未感動陽氣微弱即以交合必須先徐徐調和使神
和意感良久乃可令得陰氣陰氣推之須臾自強所謂
弱而內迎堅急出之進退欲令踈遲情動而止不可高
自投擲顛倒五臟傷絕精脉生致日病但數交而慎密
者諸病皆愈年壽日益去仙不遠矣不必九一三五之
數也能百接而不施瀉者長生矣若御女多者可採氣

採氣之道但深接勿動使良久氣上面熱以口相當引
取女氣而吞之可疎疎進退意動便止緩息眠目偃臥
道引身體更強可復御他女也數數易之則得益多人
常御一女陰氣轉弱為益亦少陽道法火陰家法水水
能制火陰亦消陽久用不止陰氣逾陽陽則轉損所得
不補所失但能御十二女而不復施瀉者令人不老有
美色若御九十三女而自固者年萬歲矣凡精少則病
精盡則死不可不思不可不慎之也昔正觀初有一野

老年七十餘詣余云數日來陽氣益盛自思氣血已衰
何有此盛未知垂老有此為善惡耶余答之曰是大不
祥子獨不聞膏火乎夫膏火之將竭也必先暗而後明
明止則滅今足下年邁桑榆久當閉精息欲茲忽春情
猛發豈非反常耶竊為足下憂之子其勉歟後四旬發
病而死此其不慎之效也如斯之輩非一旦疏一人以
勗將來耳所以善攝生者凡覺陽事輒盛必謹而抑之
不可縱心竭意以自賊也若一度制得則一度火滅一

度增油若不能制縱情施瀉即是膏火將滅更去其油可不深自防所患人少年時不知道知道亦不能信行之至老乃知道便以晚矣病難養也晚而自保猶得延年益壽若年少壯而能行道者神仙速矣或曰年未六十當閉精守一為可爾否曰不然男不可無女女不可無男無女則意動意動則神勞神勞則損壽若念真正無可思者則大佳長生也然而萬無一有強抑鬱閉之難持易失使人漏精尿濁以致鬼交之病損一而當百


也其服食藥物見別卷中

御女之法交會者當避丙丁日及弦望晦朔大風大雨
大霧大寒大暑雷電霹靂天地晦冥日月薄蝕虹蜺地
動若御女者則損人神不吉損男百倍令女得病有子
必顛癡頑愚瘡癰聾瞶跛盲眇多病短壽不孝不仁
又避日月星辰火光之下神廟佛寺之中井竈園廁之
側塚墓尸柩之傍皆所不可夫交合如法則有神德大
智善人降託胎中仍令性行調順所作和合家道日隆

祥瑞競集若不如法則有薄福愚癡惡人來託胎中仍令父母性行凶險所作不成家道日否殃咎屢至雖生成長家國滅亡夫禍福之應有如影響此乃必然之理可不再思之

黃帝雜禁忌法曰人有所怒血氣未定因以交合令人發癰疽又不可忍小便交合使人淋莖中痛面失血色及遠行疲乏來入房為五勞虛損少子且婦人月事未絕而與交合令人成病得白駁也水銀不可近陰令人

消縮鹿猪二脂不可近陰令陰痿也



備急千金要方卷八十三

欽定四庫全書

子部

備急千金要方卷十四至十六

詳校官太醫院醫官臣姜晟

編修臣倉聖脈覆勘

總校官中書臣朱 鈐

校對官中書臣胡紹基

謄錄監生臣李維瀛

謄錄監生臣劉耀馥

欽定四庫全書

備急千金要方卷八十四

唐 孫思邈 撰

宋 林億等 校正

平脉

平脉大法第一論

論曰夫脉者醫之大業也既不深究其道何以為醫者哉是以古之哲醫寤寐俯仰不與常人同域造次必於醫顛沛必於醫故能感於鬼神通於天地可以濟衆可

以依憑若與常人混其波瀾則庶事墮壞使夫物類將何仰焉由是言之學者必當屏棄俗情凝心於此則和鵲之功因茲可得而致也

經曰診脉之法常以平旦陰氣未動陽氣未散飲食未進經脉未盛絡脉調均氣血未亂故乃可診有過之脉

脉經云過此非也

均脉動靜而視精明察五色觀五藏有餘不

足六腑彊弱形之盛衰可以此參互訣生死之分也

又曰平脉者皆於平旦勿食勿語消息體氣設有所作

亦如食頃師亦如之既定先診寸口初重指切骨定畢
便漸舉指令指不厚不薄與皮毛相得如三菽之重於
輕重之間隨人彊弱肥瘦以意消息進退舉按之宜稱
其浮沉諸類應於四時五行與人五臟相應不爾者以
其輕重相薄尋狀論寒暑得失

凡人稟形氣有中適有躁靜各各不同氣脉潮動亦各
隨其性韻故一呼而脉再至一吸而脉再至呼吸定息
之間復一至合為五至此為平和中適者也春秋日夜

正等無餘分時也其餘日則其呼而脉至多吸而脉至少或吸而脉至多呼而脉至少此則不同如冬夏日夜長短之異也凡氣脉呼吸法晝夜變通倣四時然於呼吸定息應五至之限無有虧僻猶晷刻與四時有長短而歲功日數無遺也若人有羸有壯其呼吸雖相壓遏而晝夜息度隨其漏刻是謂呼吸象晝夜變通倣四時夫診脉當以意先自消息壓取病人呼吸以自同而後察其脉數計於定息之限五至者為平人若有盈縮尋

狀論病源之所宜也

問曰何謂三部脉答曰寸關尺也凡人脩短不同其形各異有尺寸分三關之法從肘腕中橫文至掌魚際後文却而十分之而入取九分是為尺從魚際後文却還度取十分之一則是寸寸十分之而入取九分之中則寸口也此處其骨自高故云陰得尺內一寸陽得寸內九分從寸口入却行六分為關分從關分又入六分為尺分

又曰從魚際至高骨却行一寸其中名曰寸口從寸口至尺名曰尺澤故曰尺寸寸後尺前名曰關陽出陰入以關為界如天地人為三界寸主射上焦頭及皮毛竟手上部關主射中焦腹及腰中部尺主射下焦小腹至足下部此為三部法象三才天地人頭腹足為三元也夫十二經皆有動脉獨取寸口以決五臟六腑死生吉凶之候者何謂也然寸口者脉之大會手太陰之動脉也人一呼脉行三寸一吸脉行三寸呼吸定息脉行六

寸人一日一夜凡一萬三千五百息脉行五十度周於其身漏水下百刻榮衛行陽二十五度行陰亦二十五度為一周晬時也故五十度而復會於手太陰太陰者寸口也即五臟六腑之所終始故法取於寸口人有三百六十脉法三百六十日也

診五臟脉輕重法第二

初持脉如三菽之重與皮毛相得者肺部

金秋三月庚辛之氣

如六菽之重與血脉相得者心部

火夏三月丙丁之氣

如九菽之重與肌肉相得者脾部

土王四季季夏六月戊己之氣

如十二菽之重與筋平者肝部

木春三月甲乙之氣

按之至骨舉之來疾者腎部

水冬三月壬癸之氣

心肺俱浮何以別之然浮而大散者心也

相火浮散

浮而短

濇者肺也

法金怯濇

腎肝俱沉何以別之然牢而長者肝也

如丹生苗吐穎

按之粟舉指來實者腎也

濡弱如水舉重勝船

脾者中州故其脉在中是陰陽之脉也

千金翼云遲緩而長者脾也

指下形狀第三

浮脉舉之有餘按之不足

指浮於下

沉脉舉之不足按之有

餘

重按之乃得

瀉脉細而遲往來難且散或一止復來

一曰浮而

短一曰短而止或如散

滑脉往來前却流利展轉替替然與數相

似一曰浮中如有九漉漉如欲脫

洪脉極大在指下

一曰浮而大

細脉小

大於微常有但細耳微脉極細而軟或欲絕若有若無

一曰小也一曰手下快一曰薄一曰按之如欲盛也

弦脉舉之無有按之如張弓

弦狀

一曰如張弓弦按之不移又曰浮緊弓為弦也

緊脉數如切繩狀

一曰如轉索之

無遲脉呼吸三至去來極遲

一曰舉之不足按之盡牢
一曰按之盡牢舉之無有

散脉去來促急

一曰一息云土至
一曰數者進之名緩脉去來亦遲小駛

於遲

一曰浮大而輒
陰與陽同著

弱脉極輒而沉細按之欲絕指下

一曰按之乃
得舉之即無

動脉見於關上無頭尾大如豆厥厥動搖

伏脉極重指著骨乃得

一曰關上沈不出名曰伏一曰
手下裁動一曰按之不足舉之

有乳脉浮大而輒按之中央空兩邊實

一曰指下
無兩傍有輒脉

極輒而浮細

一曰按之無有舉之有餘一
曰細小如輒千金翼輒作濡

虛脉遲大而

輒按之不足隱指豁豁然空實脉大而長微彊按之隱

指幅幅然

一曰沈浮皆得

促脉來去數時一止結脉往來緩時

一止復來脉結者生代脉來數中止不能自還因而復

動脉代者死散脉大而散散者氣實血虛有表無裏革

脉有似沈伏實大而長微弦

千金翼以革為牢

弦與緊相類軟

與弱相類浮與芤相類

又曰浮與洪相類

微與濇相類沈與伏

相類緩與遲相類

又曰軟與遲相類

與

革與實相類

翼作牢與實相類

滑

與數相類

五臟脉所屬第四

心部在左手關前寸口

亦名人迎

肝部在左手關上腎部在

左手關後尺中

肺部在右手關前寸口

亦名氣口

脾部在右手關上腎部在

右手關後尺中脉法讚云

肝心出左

脾肺出右

腎與命門

俱出尺部

魂魄穀神

皆見寸口

左主司官

右主司府

左大順男

右大順女

關前一分

人命之主

左為人迎

右為氣口

神門決斷

兩在關後

人無二脉 病死不愈 諸經損減 各隨其部

三陰三陽

一云按察陰陽

誰先誰後

陰病治官

官藏內也

陽病治府

府外也

奇邪所舍 如何捕取 審而知之 針入病愈

脉有三部 陰陽相乘 榮衛氣血 而行人躬

呼吸出入 上下於中 因息遊布 津液流通

隨時動作 倣象形容 春弦秋浮 冬沈夏洪

察色觀脉 大小不同 一時之間 變無經常

尺寸參差 或短或長 上下垂錯 或存或亡

病輒改易 進退低昂 心迷意惑 動失紀綱

願為縷陳 令得分明 師曰 子之所問 道之根源

脉有三部 尺寸及關 榮衛流行 不失衡銓

腎沈心洪 肺浮肝弦 此自常經 不失銖分

出入升降 漏刻周旋 水下二刻 脉一周身

旋復寸口 虛實見焉 變化相乘 陰陽相干

風則浮虛 寒則緊弦 沈潛水畜 支飲急弦

動弦為痛 數洪熱煩 設有不應 知變所緣

三部不同 病各異端 太過可怪 不及亦然

邪不空見 終必有奸 審察表裏 三焦別分

知邪所舍 消息診看 料度腑臟 獨見若神

分別病形狀第五

脉數則在腑遲在臟脉長而弦病在肝

脉經作出於肝

脉小血

少病在心

扁鵲云脉大而洪出於心

脉下堅上虛病在脾胃脉滑作

一作

澀而微浮病在肺脉大而堅病在腎

扁鵲云小而緊

脉滑者多

血少氣脉澀者少血多氣脉大者血氣俱多又云脉來

大而堅者血氣俱實脉小者血氣俱少又云脉來細而

微者血氣俱虛沈細滑疾者熱遲緊為寒

脉經云洪數滑疾為熱瀋

遲沈細為寒

脉盛滑緊者病在外熱脉小實而緊者病在內

冷脉小弱而瀋謂之久病脉滑浮而疾者謂之新病脉

浮滑其人外熱風走刺有飲難治脉沈而緊上焦有熱

下寒得冷即便下脉沈而細下焦有寒小便數時苦絞

痛下利重脉浮緊且滑直者外熱內冷不得大小便脉

洪大緊急病速進在外苦頭發熱癰腫脉細小緊急病
速進在中寒為疝瘕積聚腹中刺痛脉沈重而直前絕
者病血在腸間脉沈重而中散者因寒食成癥脉直前
而中散絕者病消渴一云病浸淫瘡脉沈重前不至寸口徘徊
絕者病在肌肉遁尸脉左轉而沈重者氣微陽在胃中
脉右轉出不至寸口者內有肉癥脉累累如貫珠不前
至有風寒在大腸伏留不去脉累累如止不至寸口輒
者結熱在小腸膜中伏留不去脉直前左右彈者病在

血脉中胚血也脉後而左右彈者病在筋骨中也脉前大後小即頭痛目眩脉前小後大即胃滿短氣上部有脉下部無脉其人當吐不吐者死上部無脉下部有脉雖困無所苦夫脉者血之府也長則氣治短則氣病數則煩心大則病進上盛則氣高下盛則氣脹代則氣衰細太素作滑則氣少濇則心痛渾渾革革至如涌泉病進而危弊弊綽綽其去如弦絕者死短而急者病在上長而緩者病在下沉而弦急者病在內浮而洪大者病在外

脉實者病在內脉虛者病在外在上為表在下為裏浮

為在表沈為在裏滑為實為下

又為陽氣裏

數為虛為熱浮

為風為虛動為痛為驚沈為水為實

又為鬼症

弱為虛為悸

遲則為寒瀼則少血緩則為虛洪則為氣

一作熱

緊則為

寒弦數為瘧瘧脉自弦弦數多熱弦遲多寒微則為虛

代散則死弦為痛痺

一作浮為風症

偏弦為飲雙弦則脇下拘

急而痛其人瀼瀼惡寒脉大寒熱在中伏者霍亂安臥

脉盛謂之脫血凡亡汗肺中寒飲冷水欬嗽下利胃中

虛冷此等其脉並緊浮而大者風浮大者中風頭重鼻
塞浮而緩皮膚不仁風寒入肌肉滑而浮散者攤緩風
滑為鬼疰澀而緊痺病浮洪大長者風眩癰疾大堅疾
者癰病弦而鈎脅下如刀刺狀如蜚尸至困不死緊而
急者遁尸洪大者傷寒熱病浮洪大者傷寒秋吉春成
病浮而滑者宿食浮滑而疾者食不消脾不磨短疾而
滑酒病浮而細滑傷飲遲而濇中寒有癥結駃而緊積
聚有擊痛弦急疝瘕小腹痛又為癰病一作瘕病遲而滑者

脹盛而緊曰脹弦小者寒澀沈而弦者懸飲內痛弦數
有寒飲冬夏難治緊而滑者吐逆小弱而濇胃反遲而
緩者有寒微而緊者有寒沈而遲腹藏有冷病微弱者
有寒少氣實緊胃中有寒苦不能食時時利者難治一作
時時嘔滑數心下結熱盛滑疾胃中有熱緩而滑曰熱

稽難治

中沈而急病傷暑暴發虛熱浮而絕者氣辟大而滑中
有短氣浮短者其人肺傷諸氣微少不過一年死法當
噉也沈而數中水冬不治自愈短而數心痛心煩弦而

緊脅痛臟傷有瘀血

一作有寒血

沈而滑為下重亦為有脅

痛脉來細而滑按之能虛因急持直者僵仆從高墮下
病在內微浮秋吉冬成病微數雖甚不成病不可勞浮
滑疾緊者以合百病久易愈陽邪來見浮洪陰邪來見
沈細水穀來見堅實脉來乍大乍小乍長乍短者為崇
脉來洪大嫋嫋者崇脉來沈沈澤澤四肢不仁而重土
崇脉與肌肉相得久持之至者可下之弦小緊者可下
之緊而數寒熱俱發必下乃愈弦遲者宜溫藥緊數者

可發其汗

三關主對法第六

諸浮諸弦諸沈諸緊諸澀諸滑若在寸口膈以上病

頭部

若在關上胃以下病

腹部

若在尺中腎以下病

腰脚部

平寸

口脉主對法寸口脉滑而遲不沈不浮不長不短為無

病左右同法寸口太過與不及寸口之脉中手短者曰

頭痛中手長者曰足脛痛中手促上擊者曰肩背痛寸

口脉沈而堅者曰病在中寸口脉浮而盛者曰病在外

寸口脉沈而弱者曰寒熱及疝瘕小腹痛

熱一作氣又作中

寸

口脉沈而弱髮必墮落寸口脉沈而緊苦心下有寒時

時痛有積邪寸口脉沈而滑者胃中有水氣面目腫有

微熱為風水寸口脉沈大而滑沈即為血實滑即為氣

實血氣相搏入臟即死入腑即愈寸口脉沈胃中短氣

寸口脉沈而喘者寒熱寸口脉浮而滑頭中痛寸口脉

浮大按之反澀尺中亦微而澀故知有滯氣宿食寸口

脉弦而緊弦即衛氣不行衛氣不行即惡寒水流走腸

間寸口脉緊或浮膈上有寒肺下有水氣脉緊上寸口

者中風風頭痛亦如之

翼云亦為傷寒頭痛

脉弦上寸口者宿食

降者頭痛寸口脉弦大婦人半生漏下男子亡血失精
寸口脉微而弱微即惡寒弱則發熱當發不發骨節疼
煩當煩不煩與極汗出寸口脉微而弱氣血俱虛男子
吐血婦人下血嘔汗出寸口脉動而弱動即為驚弱即
為悸寸口脉緩而遲緩即為虛遲即為寒虛寒相搏則
欲溫食食冷即咽痛寸口脉遲而緩遲則為寒緩即為

氣寒氣相搏則絞而痛寸口脉遲而澀遲即為寒澀為少血脉來過寸入魚際者遺尿脉出魚際逆氣喘息寸口脉但實者心勞寸口脉漈漈如羹上肥陽氣微連連如蜘蛛絲陰氣衰兩手前部陽絕者苦心下寒毒喙中熱寸口脉偏絕則臂偏不遂其人兩手俱絕者不可治寸口脉來暫大暫小者陰絡也苦陰風痺應時自發身洗洗也寸口脉來暫小暫大者陽絡也苦皮膚病汗出惡寒下部不仁寸口脉浮中風發熱頭痛宜服桂枝湯

葛根湯針風池風府向火灸身摩治風膏覆令汗出寸
口脉緊苦頭痛是傷寒宜服麻黃湯發汗針眉衝顓顓
摩傷寒膏寸口脉微苦寒為衄宜服五味子湯麻黃茱
萸膏令汗出寸口脉數即為吐以有熱在胃管熏胃中
宜服藥吐之及針胃管服除熱湯若傷寒七八日至十
日熱在中煩滿渴者宜服知母湯寸口脉洪大胃脇滿
宜服生薑湯白薇丸亦可紫菀湯下之針上管期門章
門寸口脉緩皮膚不仁風寒在肌肉宜服防風湯以藥

薄熨之佳灸諸治風穴寸口脉滑陽實胃中壅滿吐逆
宜服前胡湯針太陽巨闕瀉之寸口脉弦心下幅幅微
頭痛心下有水氣宜服甘遂丸針期門瀉之寸口脉弱
陽氣虛弱自汗出宜服茯苓湯內補散將適飲食消息
勿極勞針胃管補之寸口脉澀是胃氣不足宜服乾地
黃湯自養調和飲食針胃管一作三里補之寸口脉芤吐血
微芤者衄血空虛去血故也宜服竹皮湯黃土湯炙臈
中寸口脉伏胃中逆氣噎塞是諸氣上衝胃中宜服前

胡湯大三建丸針巨闕瀉寸口脉沈胃中引脅痛胃中
有水氣宜服澤漆湯針巨闕瀉之寸口脉軟弱自汗出
是虛損病宜服乾地黄湯薯蕷丸內補散牡蠣散并粉
針大衝補之寸口脉遲上焦有寒心痛咽酸吐酸水宜
服附子湯生薑湯茱萸丸調和飲食以暖之寸口脉實
即生熱在脾肺嘔逆氣塞虛則生寒在脾胃食不消化
熱即宜服竹葉湯葛根湯寒即茱萸丸生薑湯寸口脉
細發熱嘔吐宜服黃芩龍膽湯吐不止宜服橘皮桔梗

湯灸中府平關脉主對法關上脉浮而大風在胃中張
口肩息心下澹澹食欲嘔關上脉微浮積熱在胃中嘔
吐虵蟲心健忘關上脉滑而大小不均必吐逆是為病
方欲來不出一二日復欲發動其人欲多飲飲即注利
如利止者生不止者死關上脉緊而滑者虵動關上脉
弦而長翼作大有痛如刀刺之狀在臍左右上下脉經云有積在
臍左右上下關上脉澀而堅大而實按之不減有力為中焦
實有伏結在脾肺氣塞實熱在胃中關上脉澹澹大而

尺寸細者其人必心腹冷積癥瘕結聚欲熱飲食關上
脉時來時去乍大乍小乍疎乍數者胃中寒熱羸劣不
欲飲食如瘡狀關上脉浮腹滿不欲食浮為虛滿宜服
平胃丸茯苓湯生薑前胡湯針胃管先瀉後補之關上
脉緊心下苦滿痛脉緊為實宜服茱萸當歸湯又加大
黃二兩佳脉經云又大黃湯兩治之佳針巨闕下管瀉之關上脉微
胃中冷心下拘急宜服附子湯生薑湯附子丸針巨闕
補之關上脉數胃中有客熱宜服知母湯一作除熱湯

針巨闕上管瀉之關上脉緩不欲食此脾胃氣不足宜服平胃丸補脾湯又針章門補之關上脉滑胃中有熱滑為熱實氣滿故不欲食食即吐逆宜服朴硝麻黃湯平胃丸

一作宜服紫苑湯人參大平胃散

針胃管瀉之關上脉弦胃中

有冷心下厥逆脉弦胃氣虛宜服茱萸湯溫調飲食針胃管補之關上脉弱胃氣虛胃中有客熱脉弱為虛熱作病且說云有熱不可大攻之熱去即寒起正宜服竹葉湯針胃管補之關上脉細虛腹滿宜服生薑湯茱萸

蜀椒湯白薇丸針灸三管關上脉澀血氣逆冷脉澀為
血虛宜服乾地黄湯四補散針足大衝上補之關上脉
芤大便去血宜服生地黃并生竹皮湯灸膈輸若重下
去血針關元甚者服龍骨丸關元一作巨關關上脉伏有水氣
溇泄宜服水銀丸針關元利小便止溇泄便止關上脉
洪胃中熱必煩滿宜服平胃丸針胃管先瀉後補之關
上脉沈心下有冷氣苦滿吞酸宜服白薇丸茯苓丸附
子湯針胃管補之關上脉軟苦虛冷脾氣弱重下病宜

服赤石脂湯女萎丸針關元補之關上脉遲胃中寒宜服桂枝丸茱萸湯針胃管補之關上脉實胃中痛宜服梔子湯茱萸烏頭丸針胃管補之關上脉勞脾胃氣塞盛熱即腹滿嚮嚮宜服紫苑丸瀉脾丸針灸胃管瀉之平尺脉主對法尺脉浮者客陽在下焦尺脉弱下焦冷無陽氣上熱衝頭面尺脉弱寸彊胃絡脉傷尺脉偏滑疾面赤如醉外熱則疾尺脉細微澹泄下冷利素問云尺寒脉細謂之後泄尺脉虛小者足脛寒痿痺脚疼尺脉澀下血不

利多汗

素問云尺澀脉滑謂之多汗

尺脉沈而滑者寸白蟲尺脉細

而急者筋攣痺不能行尺脉大者熱在脬中小便赤痛

尺脉粗常熟者謂之熱中腰膝疼小便赤熱尺脉按之

不絕婦人血閉與關相應和滑者男子氣血實婦人即

為妊娠尺脉來而斷絕者男子小腹有滯氣婦人月水

不利尺脉俱軟弱內慍熱手足逆冷汗出尺脉俱沈關

上無有者苦心下喘尺脉俱沈關上若有苦寒心下痛

陰中冷脚痺尺脉俱微少心力不欲言血氣不足其人

脚弱短氣尺脉俱數手足頭面有熱俱遲有寒手足頭
面有冷風尺脉浮下熱風小便難宜服瞿麥湯滑石散
針橫骨關元瀉之尺脉緊臍下痛宜服當歸湯灸天樞
針關元補之尺脉微厥逆小腹中拘急有寒氣宜服小
建中湯針氣海尺脉數惡寒臍下熱痛小便赤黃宜服
雞子湯白魚散針橫骨瀉之尺脉緩脚弱下腫一無此四字
小便難有餘瀝宜服滑石湯瞿麥散針橫骨瀉之尺脉
滑血氣實經脉不利宜服朴硝煎大黃湯下去經血針

關元瀉之尺脉弦小腹疼小腹及脚中拘急宜服建中湯當歸湯針氣海瀉之尺脉弱氣少發熱骨煩宜服前胡湯乾地黄茯苓湯針關元補之尺脉澀足脛逆冷小便赤宜服附子四逆湯針足大衝補之尺脉孔下焦虛小便去血宜服竹皮生地黃湯灸丹田關元尺脉伏小腹痛癥瘕水穀不化宜服大平胃丸桔梗丸針關元補之尺脉沈腰痛背痛宜服腎氣丸針京門補之尺脉軟脚不收風痺

一無此五字

小便難宜服瞿麥湯白魚散針關元

瀉之尺脉牢腹滿陰中急宜服葶藶子茱萸丸針丹田
關元中極尺脉遲下焦有寒宜服桂枝丸針氣海關元
瀉之尺脉實小腹痛小便不禁宜服當歸湯加大黃一
兩利大便針關元補之

備急千金要方卷八十四

欽定四庫全書

備急千金要方卷八十五 唐 孫思邈 撰

宋 林億等 校正

平脉

五臟積聚第七

人病有積有聚有穀氣

穀一作繫

夫積者藏病終不移也聚

者腑病發作有時展轉痛移為可治也穀氣者脇下牽痛按之則愈愈復發為穀氣夫病已愈不得復發令病

復發即為穀氣也諸積大法脉來而細軟附骨者為積也寸口結積在胃中微出寸口積在喉中關上結積在臍傍微下關者積在小腹尺中結積在氣衝上關上積在心下脉出在左積在左脉出在右積在右脉兩出積在中央各以其部處之寸口沈而橫者脇下及腹中有橫積痛其脉弦腹中急痛腰背痛相引腹中有寒疝瘕脉弦緊而細微者瘕也夫寒痺瘕瘕積聚之脉狀皆弦緊若在心下即寸弦緊在胃管即關弦緊在臍下即尺

弦緊一曰關脉長弦有積在臍左右上下

又脉癥法左手脉橫癥在左右手脉橫癥在右脉頭大在上頭小在下

又一法橫脉見左積在右見右積在左偏得洪實而滑亦為積弦緊亦為積為寒痺為疝痛內有積不見脉難治見一脉相應為易治諸不相應為不合治也左手脉大右手脉小上病在左脇下病在左足右手脉大左手脉小上病在右脇下病在右足脉弦而伏者腹中有癥

不可轉也必死不治脉來沈而細時直者身有癰腫若腹中有伏梁脉來沈而虛者泄注也脉來小沈實者胃中有積聚不可下食即吐

陰陽表裏虛實第八

弦為小陽緩為陽明洪為太陽三陽也微為少陰遲為厥陰沈為太陰三陰也

脉有一陰一陽一陰二陽一陰三陽有一陽一陰一陽二陰一陽三陰如此言之寸口有六脉俱動耶然經言

如此者非有六脉俱動也謂浮沈長短滑濇也凡脉浮滑長者陽也沈濇短者陰也所以言一陰一陽者謂脉來沈而滑也一陰二陽者謂脉來沈滑而長也一陰三陽者謂脉來浮滑而長時一沈也所以言一陽一陰者謂脉來浮而濇也一陽二陰者謂脉來長而沈濇也一陽三陰者謂脉來沈濇而短時一浮也各以其經所在言病之逆順也

脉有陽盛陰虛陰盛陽虛何謂也然浮之損小沈之實

大故曰陰盛陽虛沈之損小浮之實大故曰陽盛陰虛是謂陰陽虛實之意也

凡脉浮大數動長滑陽也沈濇弱弦短微陰也陽病見陰脉者逆也主死陰病見陽脉者順也主生關前為陽關後為陰陽數即吐陰微即下陽弦則頭痛陰弦即腹痛以依陰陽察病也又尺脉為陰陰脉常沈而遲寸關為陽陽脉但浮而速有表無裏邪之所止得鬼病何謂表裏寸尺為表關為裏兩頭有脉關中絕不至也尺脉

上不至關為陰絕寸脉下不至關為陽絕陰絕而陽微
死不治呼為表屬腑吸為裏屬臟陽微不能呼陰微不
能吸呼吸不足胃中短氣

弱反在關濡反在巔微在其上濇反在下微即陽氣不
足沽熱汗出濇即無血厥而且寒諸腑脉為陽主熱諸

臟脉為陰主寒陽微則汗陰浮自下

脉經作陰微

陽數口生

瘡陰數加微必惡寒而煩擾不得眠陽亢吐血

脉經作陽數則

吐血陰亢下血

脉經作陰濇即下血

無陽即厥無陰即嘔

寸口脉浮大而疾者名曰陽中之陽病苦煩滿身熱頭
痛腹中熱寸口浮沈細者名曰陽中之陰病苦悲傷不
樂惡聞人聲少氣時汗出陰氣不通

不通一作併

臂不能舉

巢源作臂
偏不舉

尺脉沈細者名曰陰中之陰病苦兩脛酸疼不能久立
陰氣衰小便餘瀝陰下濕癢

尺脉滑而浮大者名曰陰中之陽病苦小腹痛滿不能
溺溺即陰中痛大便亦然

尺脉牢而長關中無有此為陰干陽其人苦兩脛重小
腹引腰痛

寸口壯大尺中無有此為陽干陰其人苦腰背痛陰中
傷足脛寒

人有三虛三實者何謂也然有脉之虛實有病之虛實
有診之虛實脉之虛實者脉來濡者為虛牢者為實也
病之虛實者出者為虛入者為實言者為虛不言者為
實緩者為虛急者為實也診之虛實者癢者為虛痛者

為實外痛內快為外實內虛內痛外快為內實外虛故曰虛實也

問曰何謂虛實答曰邪氣盛則實精氣奪則虛何謂重實所謂重實者大熱病氣熱脉滿是謂重實也

脉盛皮熱腹脹前後不通急瞤為五實

脉細皮寒氣少泄痢注前後飲食不入為五虛也

何時得病第九

何以知人露臥得病陽中有陰也何以知人夏月得病

諸陽入陰也何以知人春得病無肝脉也無心脉夏得病無肺脉秋得病無腎脉冬得病無脾脉四季之月得病

扁鵲華佗察聲色要訣第十

病人五臟已奪神明不守聲嘶者死病人循衣縫譫言者不可治病人陰陽俱絕掣衣掇空妄言者死病人妄語錯亂及不能語者不治熱病者可治病人陰陽俱絕失音不能言者三日半死病人兩目眦有黃色起者其

病方愈病人面黃目青者不死青如草滋死病人面黃
目赤者不死赤如衄血死病人面黃目白者不死白如
枯骨死病人面黃目黑者不死黑如胎死病人面目俱
等者不死病人面黑目青者不死病人面青目白者死
病人面赤目青者六日死病人面黃目青者九日必死
是謂亂經飲酒當風邪入胃經膽氣妄洩目則為青雖
有天救不可復生病人面赤目白者十日死憂恚思慮
心氣內索面色反好急求棺槨病人面白目黑者死此

謂榮華已去血脉空索病人面黑目白者八日死腎氣
內傷病因留積病人面青目黃者五日死病人著牀心
痛短氣脾竭內傷百病復愈能起徬徨因坐於地其立
倚牀能治此者可謂神良病人面無精光若土色不受
飲食者四日死病人目無精光及牙齒黑色者不治病
人耳目鼻口有黑色起入于口者必死病人耳目及顴
頰赤者死在五日中午病人黑色出於額上髮際下直鼻
脊兩顴上者亦死在五日中午病人及健人黑色若白色

起八目及鼻口者死在三日中病人及健人面忽如馬
肝色望之如青近之如黑者死病人面黑目直視惡風
者死病人面黑脣青者死病人面青脣黑者死病人面
黑兩脇下滿不能自轉反者死病人目回回直視肩息
者一日死病人陰結陽絕目精脫恍惚者死病人陰陽
絕竭目眦陷者死病人眉系傾者七日死病人口如魚
口不能復閉而氣出多不返者死病人口張者三日死
病人脣青人中反者三日死病人脣反人中滿者死病

人脣口忽乾者不治病人脣腫齒焦者死病人齒忽變
黑者十三日死病人舌卷卵縮者必死病人汗出不流
古卷黑者死病人髮直者十五日死病人髮如乾麻善
怒者死病人髮與眉衝起者死病人爪甲青者死病人
爪甲白者不治病人手足爪甲下肉黑者八日死病人
榮衛竭絕面浮腫者死病人卒腫其面蒼黑者死病人
手掌腫無文者死病人臍腫反出者死病人陰囊莖俱
腫者死病人脉絕口張足腫者五日死病人足跖腫嘔

吐頭重者死病人足趺上腫兩膝大如斗者十日死病
人臥遺尿不覺者死病人尸臭者不可治肝病皮白肺
之日庚辛死心病目黑腎之日壬癸死脾病唇青肝之
日甲乙死肺病頰赤目腫心之日丙丁死腎病面腫唇
黃脾之日戊己死青欲如蒼壁之澤不欲如藍赤欲如
帛裏朱不欲如頰白欲如鵝羽不欲如鹽黑欲如重漆
不欲如炭黃欲如羅裏雄黃不欲如黃土

診五臟六腑氣絕證候第十一

病人肝絕八日死何以知之面青但欲伏眠目視而不

見人汗

一作泣

出如水不止

一曰二日死

病人膽絕七日死何

以知之眉為之傾病人筋絕九日死何以知之手足爪

甲青呼罵不休

一曰八日死

病人心絕一日死何以知之肩

息回視立死

一曰目亭二日死

病人腸

一云小腸

絕六日死何以知

之髮直如乾麻不得屈伸自汗不止病人脾絕十二日

死何以知之口冷足腫腹熱臚脹泄利不覺出無時度

一曰五日死

病人胃絕五日死何以知之脊痛腰中重不可

反覆

一日腓腸平九日死

病人肉絕六日死何以知之耳乾舌皆

腫溺血大便赤泄

一日足腫九日死

病人肺絕三日死何以知

之口張但氣出而不還

一日鼻口虛張短氣

病人大腸絕不治何

以知之泄利無度利絕則死病人腎絕四日死何以知

之齒為暴枯面為正黑目中黃色腰中欲折白汗出如

流水

一日人中平七日死

病人骨絕齒黃落十日死諸浮脉無根

者皆死已上五臟六腑為根也

診四時相反脉第十二

春三月木旺肝脉治當先至心脉次之肺脉次之腎脉
次之此為王相順脉也到六月土王脾脉當先至而反
不至反得腎脉此為腎反脾也七十日死何謂腎反脾
夏火王心脉當先至肺脉次之而反得腎脉是謂腎反
脾期五月六月忌丙丁脾反肝三十日死何謂脾反肝
脉當先至而反不至脾脉先至是謂脾反肝期正月二
月忌甲乙腎反肝三歲死何謂腎反肝春肝脉當先至
而反不至腎脉先至是謂腎反肝期七月八月忌庚辛

腎反心二歲死何謂腎反心夏心脉當先至而反不至
腎脉先至是謂腎反心期六月忌戊己此中不論肺金
之氣踈略未諭指南又推五行亦頗顛倒待求別錄上
比療病察其形貌神氣色澤脉之盛衰病之新故乃可
治之形氣相得色澤以浮脉從四時此為易治形氣相
失色大不澤脉實堅甚脉逆四時此為難治

逆四時者春得肺脉夏得腎脉秋得心脉冬得脾脉其
至皆懸絕澀者曰逆春夏沈澀秋冬浮大病熱脉靜泄

痢脉大脫血脉實病在中脉堅實病在外脉不實名逆
四時皆難療也凡四時脉皆以胃氣為本雖有四時王
相之脉無胃氣者難瘥也何謂胃脉來弱以滑者是也
命曰易治

診脉動止投數踈數死期年月第十三

脉一動一止二日死一經云一日死脉二動一止三日
死脉三動一止四日死或五日死脉四動一止六日死
脉五動一止七日死或五日死脉六動一止八日死脉

七動一止九日死脉八動一止十日死脉九動一止九日死又云十一日死一經云十三日死若立春死脉十動一止立春死一經云立夏死脉十一動一止立夏死一經云夏至死又云立秋死脉十二動十三動一止立秋死一經云立冬死脉十四動十五動一止立冬死一經云立夏死脉二十動一止一歲死若立秋死脉二十一動一止二歲死脉二十五動一止二歲死一經云一歲死又云立冬死脉三十動一止二歲死若三歲死脉

三十五動一止三歲死脉四十動一止四歲死脉五十動一止五歲死不滿五十動一止五歲死五行氣畢陰陽數同榮衛出入經脉通流晝夜百刻五德相生脉來五十投而不止者五臟皆受氣即無病也脉來四十投而一止者一臟無氣却後四歲春草生而死脉來三十投而一止者二臟無氣却後三歲麥熟而死脉來二十投而一止者三臟無氣却後二歲桑椹赤而死脉來十投而一止者四臟無氣歲中死得節不動出清明死遠

不出穀雨死矣脉來五動而一止者五臟無氣却後五日而死脉一來而久住者宿病在心主中治脉二來而久住者病在肝枝中治脉三來而久住者病在脾下中治脉四來而久住者病在腎間中治脉五來而久住者病在肺枝中治五脉病虛羸人得此者死所以然者藥不得而治針不得而及盛人可治氣全故也

備急千金要方卷八十五